



RELATION

VERITABLE,

*De ce qui s'est passé à la Rochelle en la reception de Monsieur de Soubize,
au retour de Rié.*

AVssitost que la nouuelle de la memorable expedition de l'isle de Rié fut arriuée à la Rochelle, les deputez de l'assemblée tous resiouys furent d'opiniõ que Monsieur de Soubize reuenant ainsi victorieux deuoit estre receu avec triomphe. A cela conclurent aussi en leur hostel de ville le Maire & les autres Magistrats : Pour apres donner ordre à tout l'appareil, fallut en deliberer en plain consistoire, afin que rien ny fut obmis de ce qui appartenoit à la magnificēce de la ville & au merite du sujet. Ce fut en ce lieu, ou le President de l'assemblée, apres auoir hautement loüé l'entreprise & bon succez de leur armée : adiousta que Monsieur de Soubize (auquel com me

Chef se deuoit referer l'honneur de la con-
 duitte d'icelle) deuroit estre recompensé Cas
 par des arcs triomphaux, pour en laisser vne F
 glorieuse memoire à la posterité. mais le mal 39
 estoit que ledit sieur de Soubize diligent 326
 Capitaine en ses retraittes guerrieres ne leur 1622
 donneroit iamais le loisir d'y trauailler com- rela
 me il seroit requis : Et que sans s'amuser à
 des desseins si grands, son aduis seroit de re-
 medier aux choses qui pourroient estre plus
 facilement & plus promptement expediees.
 C'est a sçauoir d'accommoder au mieux
 que le temps le permettroit la face de la
 porte par laquelle se feroit son entrée l'enri-
 chissant de belles deuises & inscriptions con-
 uenables à la qualité du Seigneur, & à l'oc-
 casion qui s'en presentoit : de cela toute la
 compagnie en demeura d'accord sans nul
 contredit, & ledit President poursuiuant
 son propos, aduertit que telles deuises pour
 auoir plus de grace, & de majesté deuoient
 estre faictes en autre langue que François
 & vulgaire, & que chacun en pourroit pro-
 duire de son inuention pour apres choisir
 celles qui se trouuerroient les plus propres.
 Or d'autant que dans les Eglises reformees
 à la nouuelle façon l'on à introduit vne cou-
 stume de n'observer ny rang, ny ordre entre
 les personnes qui toutes viuent dans vne mi-
 sterieuse esgalité, sans regarder a qui parlera

premier, ou dernier, les plus hastez & non
 les plus dignes marchans deuant : fuiuant
 ceste loy d'indifference que Calvin ce grand
 reformateur a establie dans le Ciel aussi
 bien que dans la terre : vn ieune proposant
 qui n'agueres s'estoit acouplé avec vne No-
 nain fraischement desuoilée pour luy estre
 compagne en l'exercice du saint ministere,
 s'aduança deuant tous pour dire qu'il luy
 sembloit que l'on pourroit employer fort
 gentiment ces parolles en Italien (*no fuge
 qui torna a casa*) ou bien ces autres (*vn bel fu-
 gir tuta la vita scampa.*) Vn vieux surueillant
 repartit la dessus (non sans vn peu d'esmo-
 tion) que le sens en estoit fort bon, mais
 que le langage en estoit du tout scandaleux,
 a raison que c'estoit le langage de l'Ante-
 christ qui est Italien. Car vous sçauiez (di-
 soit-il) que le Pape de Rome est le seul &
 vray Antechrist, comme il fut passé en arti-
 cle de foy bien autenticquement au celebre
 Synode de Gap, & comme il a esté bien
 confirmé par le liure du mystere d'iniquité
 composé par Monsieur du Pleffis, lequel
 vous cognoissez pour gentilhomme digne
 de foy & qui ne voudroit rien alleguer de
 faux, cōme il se verifia tres-bien & glorieuse-
 ment en la conference de Fontaine-bleau.
 Conclusion nous ne deuons (dit-il) com-
 muniquez à ce fils de perdition ny en œu-

ures ny en paroles : & pour ceste cause nous detestons sa langue Italienne & luy disons anatheme. Apres cela vn autre ieune esgri-liat se dressant sur ses pieds demanda si l'on auroit plus agreable ces paroles d'une autre langue (*antes huyr que pelear*) encores moins s'escria vn Ministre du pays de Bearn, tout effarouché : car c'est la langue Espagnolle que parle ceste maudite & abominable inquisition que nos Eglises reformees apprehendent comme la malle-peste. Il seroit bien mieux feant de rechercher quelque belle sentence en langue Latine, telle que jadis Rome la parloit au siecle d'or de son innocence & pureté, auquel l'Antechrist n'auoit encores corrompu ny la langue ny la doctrine : en ce temps (disoit-il) trois & quatre fois heureux, auquel Rome iouyssoit de la liberte de la conscience, aussi bien que de la liberte de la republique, y estant libre à vn chacun de se forger telle croyance, & suiure telle forme de religion qui luy venoit en fantasie : comme il se pratique auioird'huy fort heureusement en nos Eglises reformees. Quand à la langue Grecque pour en dire franchement la verité nous ny entendons tous rien : En la Latine encores que tous nos anciens, Diacres, & surueillans, bons iardiniers, sauetiers, ou frippiers de leur mestier y cognoissent aussi

peu, ny mesmes la plus grande part de nos Ministres qui sont suffisamment sçauans, s'ils peuuent lire dans les Bibles Françoises: toutesfois il y en a quelques vns qui retiennent encores quelque chose de ce qu'ils en auoient appris dans les cloistres auant que ietter le frocq aux ortyes, & renoncer aux Idolatreries de la papauté: ceux-la pourront en donner l'interpretation aux autres. Ce discours fut approuué & suiuy de tous, & à l'instant les esprits les plus frais esmolus se mirent aux champs pour faire à l'enuie preuue de leur suffisance. Le premier qui se mit en auant proposa ces beaux mots (*degeneres animos timor arguit*) vn autre ceux-cy (*pedibus timor addidit alas*) & plusieurs autres se presentoient à la foule pour en dire leur rattellee, quant Monsieur du Moulin ministre iadis de l'Eglise defuncte de Charenton les arresta faisant signe de la main que l'on luy donnast audience. Lors s'estant fait vn tres-grand & respectueux silence, il parla comme s'ensuit. Messieurs & freres en Christ, ie ne puis donner sinon beaucoup de loüange aux braues esprits, qui ont en leurs ingenieuses deuises fait veoir la profondeur de leurs belles conceptions: Mais il y a (sous correction) encores quelque deffault: car ce ne sont que parolles tirees des liures d'autheurs prophanes, ce qui va

directement contre les reigles de nostre reformation, par lesquelles nous sommes instruits de n'admettre aucune chose pour luy donner credit, & autorité, s'il n'a son passeport en termes expres & formels de l'escripture : Ce qui en vn fait d'importance comme celuy dont est question doit rendre l'action plus venerable & de plus grande edification enuers les ames fidesles. C'est pourquoy : il me semble (sauf l'aduis de la compagnie) qu'il ne seroit point impertinent de grauer en grosses lettres rouges au lieu destiné pour cela, ces belles & energiques parolles extraictes des Pseaumes de Dauid (*mare vidit & fugit*) tout le concistoire receut avec admiration & applaudissement (comme vn vray oracle) ceste remonstrance reformée & la deuise tout ensemble : & tout de ce pas on vouloit proceder a l'execution : Mais Monsieur de Soubize venoit a si grand haste qu'ils n'en eurent pas le temps : car a l'instant mesme survint vn homme courant de toute sa force, pour annoncer à la compagnie que le guet descouvroit vne troupe de gens à cheual venans au grand galop vers la ville, & que ce ne pouuoit estre que Monsieur de Soubize & son train. En ceste surprise l'on ne trouua meilleur expedient que de s'en aller sans autre ceremonie ny ordre, au deuant

9
apres auoir prié ledit sieur du Moulin de faire la harangue, pour estre personnage qui parle aussi sagement à l'impourueu, que quand il a longuement premedité. Quelque diligence que l'on peust faire l'on rencontra ledit sieur de Soubize qui estoit desja aduancé entre le tappecul & le pont leuis. Lequel ayant vn appetit extraordinaire pour auoir faict vn ieusne sans commandement de plus de vingt quatre heures, pria ledit sieur du Moulin de le faire court, cela luy fit abreger son discours se contentant de le remercier en passant de ses bons deuoirs à l'augmentation de la cause, & de ce que par son moyen les Eglises reformees de France auoit dequoy allonger le cathalogue de leurs martyrs : ne s'en estant faict vn si grand nombre tout à la fois depuis la iournée de Montcontour, il adiouta que l'on eust faict tirer le Canon, si pour le bien des affaires il ne l'eust laissé à la garde de Rié avec les vaisseaux. La soudaineté de ceste entrée fut cause que depuis toutes choses furent faictes avec precipitation, & en telle confusion que l'on n'en scauroit que dire : il n'y eut que les femmes lesquelles ayant part en ceste allegresse commune, en voulurent aussi tesmoigner leurs ressentimens : mais elles cuiderent seicher d'impatience pour le long temps qu'il leur falut

attendre que Monsieur de Soubize se fut refaict de manger & de dormir, dequoy il auoit grand besoin, pour estre fort fatigué des guerres. Ce pendant celles qui estoient plus releuees de biens & de qualité s'estant assemblees, firent eslection entre elles d'une qui parroissoit de plus gentille maniere, & qui auoit le bec le mieux affillé pour porter la parole, & faire au nom de toute la bande les compliment propres à se conjoindre avec ce grand Chef d'armée, de ses valeureux exploits & de son prompt retour : à la premiere commodité qui s'en offrit les voyla marcher en moult belle ordonnance : & à l'abbord ayant faict les reuerences à la mode, la harangueuse commença à parler de ceste sorte.

Vous soyez Monsieur le mieux que bien venu, vous & vostre compagnie, laquelle estant si petite nous est bien plus agreable que si elle estoit plus grande : Car apres les ruines que nous a causees ce Duc d'Espernon, pour auoir serré nos moissons, & nos vendanges si vous eussiez ramené beaucoup de gens ils n'eussent serui qu'à faire encherir les viures : il vaut bien mieux qu'ils soient demeurez pour faire des momies de leurs corps dans les sables d'Olonne & de Ryé, ou qu'ils soient allez ronger du biscuit dans les galleres que d'estre ve-

nus affamer nostre ville : il n'y a que trop de mangeurs sans cela , & ny eust-il (parlant par reuerence) que la fuite de Madame l'assemblée. Quand à vous MONSIEUR, nous sommes bien ioyeuses de vous veoir apres auoir passé la mer , comme firent autres fois les enfans d'Israël : car il n'y a point d'autre difference , sinon que ceste mer là estoit rouge : & celle-cy est d'un autre couleur , que Moyse la passa à pied , & vous l'avez (d'une façon plus honorable) passée à cheual : & puis la diligence vous estoit fort recommandée , qui est une partie des plus necessaires à un grand Capitaine tel que vous estes. Mais à propos de diligence , l'on s'estonne qu'en ceste occasion si pressante vous n'empruntastes les ailes de Melusine vostre grand mere , laquelle en tel besoin n'eust osé les vous refuser : vous vous en souuiendrez une autres fois : & cecy soit dit par aduis. J'oubliois à vous dire que le soin que nous auons de vostre santé nous oblige à vous conseiller de vous faire seigner , si desja vous ne l'avez faict : vous sçauiez bien pourquoy. Reste maintenant à vous remercier (comme nous faisons de tres-bon cœur) de nous auoir si honnestement dechargees de grand nombre de fascheux marys , autant inutiles au meynage , qu'insupportables en leurs humeurs nous en estiōs sans mētir long

temps y a fort lassés ils vouloient bien viure
 & se gouverner en toutes leurs actions avec
 la liberté de conscience (qui est le seul fon-
 dement de nostre religion) sans vouloir per-
 mettre que nous fissions le mesme, nous for-
 çant par ce moyen d'aller contre le decret
 de nostre predestination : & bien que nos
 ministres enseignent en leurs presches qu'il
 est impossible de se contenir, aussi bien que
 d'accomplir les autres commandemens de
 Dieu, & qu'ils applicquent tres-bien d'un
 zele reformé ce point de doctrine a leur ad-
 vantage, neantmoins ils voudroient en in-
 terdire l'usage aux pauvres femmes, comme
 si elles n'auoient aussi bonne part à l'Euan-
 gile que les hommes. Pourquoi doncques
 nous en donnent-ils non seulement les en-
 seignement de parolle : mais encore l'exem-
 ple par les effects ? Car pour ne parler que
 des Ministres qui sont nos pasteurs, s'il arri-
 ue maladie, ou absence de leurs femmes : ils
 disent auoir trouué dans la Bible qu'ils peu-
 uent donner la main d'association à leurs
 seruantes pour engendrer des enfans au Sei-
 gneur, lesquels sont asseurez d'estre sauuez
 en la foy de leurs peres, sans auoir besoin de
 Baptesme n'y autre Sacrement, leurs peres
 leur ayant acquis paradis gratuitement par
 droit de succession, & encores qu'ils soient
 enfans enclins à tout mal & inutiles à tou-

bié. Avec tout cela si quelque femme pour subuenir à ses necessitez naturelles estoit cōtrainte (comme il aduiét fort souuent au deffault des marys) de s'accointer charitablement d'un hōme (encore que ce fut avec la foy requise) ils en feroient vn scandale, capable de nous faire toutes mourir de honte. Mais ils n'auront plus affaire desormais à des nicaïses & des sotes : nous auons mis le nez dans les Bibles aussi bien qu'eux, & sçauons aussi bien qu'eux (& ne leur en desplaise) que quelque chose que l'on puisse faire, rien n'est imputé a mal à ceux qui sont au nombre des esleus : & nous auons bonne certitude d'en estre parce que nous en aprent l'esprit interieur, lequel nous donne pareillement l'intelligence parfaicte des escriptures en la lecture desquelles ne se rencontre passage qui ne nous soit plus clair que des chenets frottez de tripoly. C'est pourquoy nous n'auons aucune necessité de recourir à ce que nos Ministres en peuuent dire ou escrire : car ce ne sont que des hommes & par consequent leur esprit sujet à faillir : ce que l'on ne sçauroit dire de l'esprit des femmes, qui est bien d'une autre estoffe plus pointu & plus penetrant. Mais de cecy l'on en traitera plus soigneusement au prochain Synode, lequel se conuocquera (comme nous esperons) apres que Monsieur de

Rohan vostre frere , aura aussi vertueusement operé de son costé que vous auez fait du vostre : excusez moy MONSIEVR , si vne chaleur de foye à quoy ie suis vn peu sujette m'a fait extrauaguer loin de mon propos. Ie reuiens à mes moutons , pour au nom de ceste assistance me resiouyr de vos ioyes , & me contenter en vos contentemens. Nous auions intention de vous faire vn present de fruiçts bien choisis : mais ne s'estant peu trouuer vn seul bon chrestien en ceste ville , on vous apporte ce panier de poires d'angoisses , qui sont fruiçts du mois d'Auril , cueillis n'agueres dans l'isle de Rié. Sur ce , nous prenons congé de vous , & demeurôs toutes à vostre commandemens quand ce seroit à heure de minuit. Mōsieur de Soubize les remercia fort gratieusement de leur bon vouloir , mais quand à leurs poires il leur dit , qu'elles ne se deuoient mettre en si grands frais , d'autant que luy & toutes ses troupes en auoient tant mangé sur les lieux que leurs dents en estoient encores agacees , & qui plus est il en estoit venu à plusieurs des estranguillons , & à tous en general de grandes deffailances de cœur , auxquelles ne s'estoit trouué plus prompt remede que celuy de quelques habilles paysans rencontrez sur les chemins qui par le seul atouchement en auoient guaruy autant qu'il s'en estoit pre-

635
senté. Les femmes apres cela retirees & les
resiouyssances continuant tousiours : arri-
uerent par mer lettres de la part des habi-
tans de Royan , à Messieurs de l'assemblée,
par lesquelles ils donnoient aduis que l'on
les menassoit du siege requerant avec ar-
dantes prieres , que l'on leur enseignast la
porté par laquelle ils pourroient entrer dans
l'Eglise inuisible pour se cacher en quelque
recoing & se sauuer du peril eminant de la
persecution : car de se resoudre d'attendre
le martyre , c'est chose ou il n'y a ny hon-
neur ny profit , puisque les Eglises refor-
mees n'ordonnent point de feste à leurs
martyrs en terre , ny de plus haut siege en
Paradis. Surquoy apres meure deliberation
fut respondu par ladite assemblée, appellé
en icelle les Ministres mieux entendus que
depuis que l'on auoit retranché de la di-
scipline des Eglises reformées , les ieusnes
& abstinences comme abus papisticques,
l'on ne se vouloit plus renfermer en ceste
Eglise inuisible , dans laquelle on ne boit ny
mange. Et qu'au reste les freres qui estoient
dans Royan ne deuoient perdre courage:
car s'ils estoient predestinez à estre pendus
s'estoit chose qui ne se pouuoit aucunement
euitier : mais que bien heureux seroient
ceux à qui cela arriueroit : car estant esleuez
de terre par la corde , c'estoit autant de che-

min gagné pour monter plustost au ciel.

A P P R O B A T I O N .

L'Assemblée generale des Eglises reformées de France, tenant à la Rochelle, apres avoir leu relu & bien examiné de point en point : le Discours intitulé Relation veritable de ce qui s'est passé à la Rochelle, en la reception faite à Monsieur de Soubize, au retour de Rié : & l'ayant approuvé en toutes ses parties, à pareillement estimé qu'il seroit à propos de l'Imprimer, pour le donner au public, comme contenant une histoire digne de memoire, laquelle doit servir de consolation aux amateurs de la pure religion & d'exemple à ceux qui font profession d'honneur. Fait le 23. du mois d'Auril 1622.

Signé

MYTOIS President.

CLEMENCEAU adioint.

CASAVBON & SAVARE, Secretaires.